



*Bo di fûr, bo di man, ce fasarîno mai doman?*

24-12-1965 - 15.30

Un biel intervent.»

«Sì, se al reagjirà cemût che o sperìn doman no brindarìn dome par Nadâl.»

«Sperìn ben alore!»

«Sigûr, intant bon Nadâl, e pal rest o viodarìn»

«Bon Nadâl»

24-12-1965 - 23.00h

«Che al scusi dotôr, o sai che o sin la gnot di Nadâl, ma nus à dite di clamâlu se al jere alc di impuartant»

«Sì disêtimi, isal alc?»

«Il numar 33/61, une crisi»

«A son passadis 8 oris de fin dal intervent, o ven subite a viodi»

Il dotôr Adam al torne tal Centri di sperimentazion sui animâi, al passe te aree risiervade fin te sale postoperatorie li che al è il numar 33, un cjan bastart di 4 agns: oris prime i àn trapiantât il cerviel dal numar 61. Al è immobil, no si lamente, al à lis cuardis vocâls taiadis come ducj i siei compagns.

Il dotôr Adam si svicine par esaminâlu: 33/61 al vierç i voi, a son lis 24.00.

«Viodìn ce che o fasarìn di te...” al dîs sot vôs il dotôr. Il numar 33/61 al vierç la bocje ... e al dîs:

«NO STÂ A FÂ A CHEI ALTRIS...»

Il professôr al salte indaûr sbalsamât, al clame l'inservient zigant:

«Al fevele! Al fevele! Il numar 33 al fevele!»

Il cjan al torne a dî, cjalant il dotôr Adam tai voi:

«NO STÂ A FÂ A CHEI ALTRIS CE CHE NO TU VUELIS CHE TI FASIN A TI»

Al rive l'inservient:

«Dotôr ce disial?»

«Al fevele! Al fevele! Il numar 33 al fevele!»

«Ma dotôr...»

24-12-1967 - 11.00h

«Signorine, par plasê nus fasi une relazion di sintesi dal câs Adam»

«Al è jentrât ai 25 di dicembar dal 1965, par crisis alucinatoriis: al crodeve che i animâi i fevelassin e al veve atacs violents di agressivitât cuintri ogjets e personis. I vin fat trataments chimics e elektroconvulsîfs, ma nol à dât risultâts positîfs: si refude di mangjâ cjar e cumò al crôt che ancje dome scarpis o furniments di piel de cjamese di fuarce i fevelin. A pene che...»

«Va ben, va ben, signorine, o vin capît. Coleghis de Comission, mi pâr che dopo doi agns la situazion e je definide: la sience e à une soluzion. Ce disêso?»

«Sì»

«Sì, dotôr»

«Va ben, dotôr»

«Ben signorine, par plasê che e fissi l'intervent di lobotomie pal câs Adam cun prioritât.»

«Sì, siôr dotôr»

«Ben, mi pâr che par vuê al jere l'ultin câs. Alore nuie, si viodìn pe prossime riunion, e intant bon Nadâl!»

«Bon Nadâl!»

*Bo di fûr, bo di man, ce fasarìno mai doman?*

**di Spirt Anonim**

**Conte n. 155**

Par condividi:

[Facebook](#)

[WhatsApp](#)

[Telegram](#)

[Print](#)

[Email](#)